

- UVOD -

OMLADINSKI RESURSNİ CENTAR (ORC) TUZLA; OMLADINSKA MREŽA BOSNE I HERCEGOVINE

Omladinska mreža Bosne i Hercegovine je neformalni skup vanstranačkih organizacija, grupa i osoba koje zadovoljavaju potrebe mladih u entitetima, aktivno ih uključujući u izgradnju demokratskih vrijednosti i jačanje civilnog društva. (Misija hCa Omladinske mreže u Bosni i Hercegovini, ustanovljena na radionici strateškog planiranja u Kulašima, 11. - 17. juli 1999.g) Danas mreža okuplja 137 članica i 52 pojedinca iz 63 mjesta u BiH (zadnji podatak iz aprila 2011. godine, nakon revizije).

Dragi prijatelji, pred vama se nalazi **aprilsko** izdanje mjesečnog informativnog biltena Omladinskog Resursnog Centra (ORC) Tuzla i Omladinske mreže Bosne i Hercegovine.

Bilten izlazi na bosanskom-srpskom-hrvatskom i engleskom jeziku. U njemu se nalaze informacije o aktivnostima Omladinskog Resursnog Centra (ORC) Tuzla, te Omladinske Mreže Bosne i Hercegovine, informacije o mjesečnim aktivnostima omladinskih organizacija i grupa - članica ove mreže, njihovi planovi za naredni period, te ostale korisne informacije (donatori, pozivi na konferencije i seminare, školarine, stipendije...).

Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

Aktivnosti u aprilu 2011.	2
Planovi za maj 2011.	4
Aktivnosti dijela članica mreže	5
Nove članice	16
Informacije/pozivi	17
Donatori, školarine, stipendije	19

AKTIVNOSTI hCa/ORC U APRILU 2011.

„Pozorišni karavan bez granica“

U okviru partnerstva u projektu Draft Teatra Tuzla „Pozorišni karavan bez granica“, a pod pokroviteljstvom Anna Lindh fondacije, Omladinski resursni centar Tuzla je, zajedno sa PRONI centrom za omladinski razvoj Brčko u Brčkom, 1. aprila organizovao okrugli sto sa temom:

„Aktuelni problemi u vezi statusa i situacije manjinskih grupa u Brčko Distriktu BiH - Potrebe za očuvanjem kulturnog naslijeđa, kao i koristi od kulturne različitosti“

Cilj ovog projekta je ponuditi manjinama, mladima, imigrantima i ostalim ugroženim grupama da istraže kulturne sličnosti i različitosti između ciljanih zemalja (Crna Gora, Slovenija, Turska, Bugarska i BiH) i razumiju važnost poštovanja kulturne različitosti. Učesnici okruglog stola su bili predstavnici manjinskih grupa, mediji, predstavnici lokalnih organa vlasti, predstavnici NVO, umjetnici, referenti za saradnju sa NVO-ima i pitanjima mladih, predstavnici škola kao i romski poslanik u Skupštini Brčko Distrikta BiH. Ukupno je bilo 30 učesnika na Okruglom stolu koji su svojim aktivnim sudjelovanjem učinili da debata iskristališe niz preporuka i ukaže na bitnost ovakvih skupova u cilju rješavanja nagomilanih problema manjinskih zajednica u Brčko distriktu BiH i nemogućnosti očuvanja i promocije kulture manjinskih naroda.



Po završetku Okruglog stola učesnici su donijeli zajedničku izjavu - apel u vezi statusa i situacije manjinskih grupa u Brčko Distriktu BiH, njihovih potreba za očuvanjem kulturnog naslijeđa, kao i korisnosti postojanja kulturne različitosti.

ZAKLJUČCI I PREPORUKE

- Aktivnije uključivanje nacionalnih manjina u procese zapošljavanja kao i u rad organa vlasti Brčko Distrikta BiH;
- Raditi na boljem upoznavanju položaja i broja manjinskih nacionalnih grupa koje egzistiraju na području Brčko Distrikta BiH;
- Aktivniji rad i osnivanje udruženja nacionalnih manjina i umrežavanje sa postojećim strukturama u BiH i šire;
- Uspostaviti radno mjesto u institucijama Brčko Distrikta BiH za pitanja nacionalnih manjina;
- Uložiti dodatne napore u školama za kako bi se povećao procenat romske djece koja bi ostala i završila redovno školovanje;
- Dodatno obrazovati djecu i mlade o važnosti poznavanja drugih kultura i tradicija te povećati broj aktivnosti koje promovišu toleranciju i
- Povećati stepen zapošljavanja i stambenog zbrinjavanja romske populacije.

Istoga dana je DRAFT Teatar Tuzla brčanskoj publici u Omladinskom centru Brčko Distrikta ponudio predstavu: „Siroti mali hrčci“.



Akcijom „regionalnog odmrzavanja“ u utorak, **26. aprila u 11.55 časova** u gradovima Bosne i Hercegovine, Slovenije, Hrvatske, Srbije, Crne Gore, Kosova i Makedonije počela je dosad najveća regionalna kampanja, tokom koje će se prikupljati milion potpisa podrške za osnivanje REKOM-a, *Regionalne komisije za utvrđivanje činjenica o ratnim zločinima i drugim teškim kršenjima ljudskih prava počinjenim od 1991. do 2001. na prostoru nekadašnje SFRJ.* (www.zarekom.org)

U istovremenoj akciji u gradovima u regionu učestvuje više od 2.000 volontera i volonterki, dok će hiljade mladih biti nosioci kampanje prikupljanja potpisa koju će koordinirati Inicijativa mladih za ljudska prava, a koja će u svim zemljama nasljednicama SFRJ trajati do 6. juna. Potpisi se u Bosni i Hercegovini skupljaju na štandovima u 40 gradova, ali i u okviru on-line potpisivanja peticije <http://support.zarekom.org>

Deset godina od kraja oružanih sukoba na tlu nekadašnje SFRJ, ni u jednoj od država nije dovršen popis ubijenih u ratu, a više od 15.000 osoba i dalje se vode kao nestale. Žrtve su marginalizovane, njihovi glasovi se u javnosti rijetko čuju, a brojevima ubijenih često se manipuliše u političke svrhe.

Ovi i mnogi drugi razlozi naveli su više od 1.500 udruženja i pojedinaca svih nacija i vjera sa prostora bivše SFRJ, okupljene u Koaliciji za REKOM, da zagovaraju stvaranje nezavisne međudržavne komisije kao vanskudskog istražnog tijela koje treba da utvrdi i javno saopšti činjenice o proteklim ratnim zbivanjima. Među njima su udruženja žrtava, nestalih, veterana, logoraša, novinara, manjinskih zajednica, organizacija za ljudska prava.

Komisija će održavanjem javnih slušanja ispričati žrtvama pomoći da se u regionu čuje njihov glas, i da se na taj način javnost podstakne na saosjećanje, poštovanje i solidarnost sa žrtvama iz svih etničkih skupina. U svom završnom izvještaju, trebalo bi da sačini popis ubijenih i nestalih, masovnih grobnica, logora i drugih mjesta zatvaranja.



Nadamo se da će svi dobronamjerni ljudi potpisom podržati inicijativu koja može da pomogne da se vrati dostojanstvo žrtvama i njihovim porodicama, utvrdi sudbina nestalih i konačno, činjenice o ratnim zločinima.

Simbolični potpisi podrške će tokom juna ove godine zajedno sa Prijedlogom Statuta REKOM-a biti predati svim parlamentima u regionu, od kojih će se tražiti osnivanje komisije. Potpis možete dati i na zvaničnom sajtu www.zarekom.org, na kom su detaljne informacije o Inicijativi za REKOM.

REKOM su dosad podržali predsjednici Hrvatske i Srbije Ivo Josipović i Boris Tadić, Skupština Crne Gore, Evropska komisija i Evropski parlament, kao i brojne javne ličnosti u regionu.

U prikupljanju potpisa u BiH učestvuju volonteri iz omladinskih organizacija iz: Tuzle, Kalesije, Živinica, Banovića, Lukavca, Bihaća, Cazina, Velike Kladuše, Bosanske Krpe, Sanskog Mosta, Zenice, Zavidovića, Travnika, Maglaja, Tešnja, Gradačca, Srebrenika, Orašja, Jablanice, Konjica, Mostara, Sarajeva, Vlasenice, Milića, Brčkog, Bijeljine, Lopara, Banja Luke, Boboja, Modriče, Prijedora, Odžaka, Trebinja...

27. aprila su ORC Tuzla posjetile Sasha Barnes i Edita Selimbegović iz „International Organization for Migration“ (IOM). Povod sastanka bile su mogućnosti ostvarivanja saradnje i partnerstva u okviru pripreme projekta IOM-a, čiji bi korisnici bili mladi ljudi i omladinske organizacije iz BiH i dijaspore.

Tokom aprila radili smo na:

Održavanju i razvoju komunikacija i kordinacije unutar Omladinske mreže Bosne i Hercegovine (www.omladina-bih.net). U okviru toga smo:

- svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti);
- Održavali i redovno dopunjavali informacije na našoj web stranici www.omladina-bih.net
- Slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima);
- Vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

Održavanju i servisiranju BH mreže Anna Lindh fondacije. U okviru ovoga smo:

- Nastavili sa pripremama za zajedničke aktivnosti u okviru ALF BiH. U okviru ovoga, tokom maja će u 10 BiH gradova biti održane javne tribine/debate. Cilj ovih debata je poticanje međugeneracijskog dijaloga o kulturalnoj i socijalnoj različitosti kroz simultane događaje. Očekivani rezultati okruglih stolova/debata su razvitak instrumenata za kulturalnu i tradicionalnu prezentaciju manjinskih grupacija u deset gradova u BiH.

PLANIRANE AKTIVNOSTI U MAJU 2011.

Nastavak rada hCa/ORC Tuzla na redovnoj distribuciji informacija omladinskim organizacijama u Bosni i Hercegovini, kao i uređivanje i distribucija mjesečnog biltena Omladinske Mreže Bosne i Hercegovine;

Nastavak koordinacije bosanskohercegovačke mreže, u okviru Anna Lindh Fondacije;

Nastavak aktivnosti prikupljanja potpisa podrške osnivanju REKOM-a.

Svoje potpise možete dati na: <http://support.zarekom.org>

AKTIVNOSTI ČLANICA OMLADINSKE MREŽE BIH



SARAJEVO OPEN CENTRE
SARAJEVSKI OTVORENI CENTAR
SARAJEVSCHY OTBORENYI CENTAR

SARAJEVSKI OTVORENI CENTAR

Tina Ujevića 19/1, 71 000 Sarajevo

Tel/fax: 033 219 797

E-mail: office@soc.ba

Web: www.soc.ba

U čast proslave Dana Evrope 9. maja EUNIC u Bosni i Hercegovini i Sarajevski otvoreni centar organizuju: SEDMICU EVROPSKOG FILMA 2011

Sarajevo, 10.-19. maj, Kinoteka BiH, Ališpašina 19 - ULAZ SLOBODAN

/Titlovi na b/h/s- u i engleskom jeziku/

10.5.2011, 19:30 h

Avanturisti, Mađarska, 2008, 100 min., režija: Béla Paczolay

Géza, trubač, u svojim pedesetim, već decenijama živi u Mađarskoj. Nakon četvrtog razvoda izgubio je sve što je imao. Njegov sin, András se izdržava preko čudnih poslova, često ilegalnih i obično je na gubitku. Dolaze u malo selo kako bi odveli djeda u Budimpeštu i tako ga spasili od mizernog života izazvanog bakinom senilnošću. Putovanje počinje, ali da li će igdje stići?

11.5.2011, 19:30h

Možda u nekom drugom životu, Austrija, 2010. 96 min., režija: Elisabeth Scharang

April 1945. - u zadnjim danima rata: Kroz crni humor ovaj dirljivi film opisuje priču mađarskih Židova koji su se našli napušteni u jednom austrijskom selu. U ovakvoj situaciji jedan od zarobljenika, inače operski pjevač iz Budimpešte, odluči sa svojim kolegama, koji se nalaze u istoj situaciji kao i on, uvježbati operetu *Bečka Krv (Wiener Blut)*. S vremenom će se to pokazati kao strategija preživljavanja zahvaljujući kojoj bi dobili kuhani krompir ili vruću čorbu iz kuhinje gospođe Fasching.

12.5.2011, 19:30h

Djevojka iz Monaka, Francuska, 2008, 95 min., režija: Anne Fontaine

Advokat Bertrand odlazi u Monako da bi omogućio odbranu sedamdesetogodišnjeg ubice. On mu omogućava tjelohranitelja, Christophe-a, iskrenog i povučenog. Srednjovječnom Beauvois-u se svidjela Audrey, dvadesetogodišnja, slobodna, voditeljica vremenske prognoze na lokalnoj TV kući, koja je nekada izlazila sa Christophe-om. Iako je Christophe upozorio Beauvois-a da se drži podalje od nje, on se ipak spetlja s njom te provodi s njom svaki slobodni trenutak. Koja je njena priča: hoće li narušiti slučaj, je li Beauvois njena igračka, trči li za parama ili je iskrena? Da li je propao Christophe-ov pokušaj da ga zaštiti?

13.5.2011, 19:30h

Uranija, Grčka, 2006, 95 min., režija: Kostas Kapakas

U Grčkoj se život odvija pod tiranskom vladavinom vojne hunte, čiji se pritisak može osjetiti u svakom kutku. I upravo u jednoj takvoj atmosferi mladi odrastaju pod uticajem snova, predrasuda, tajni i laži. Ljeto '69. predstavlja prekretnicu u njihovim životima. Uranija je prelijepa gospođa koja živi nadomak sela, u kući pored mora. Djeca daju zajedničku zakletvu: da će uštediti dovoljno novca da bi mogli posjetiti Uraniju i biti upućeni u misterije ljubavi. Ali kada se suoče sa velikom dilemom - da li kupiti prvi crno-bijeli televizor da bi mogli pratiti prve korake na Mjesecu ili ostati vjerni njihovoj zakletvi i posjetiti Uraniju, dječaci odustaju i Ahilej ostaje sam.

15.5.2011, 19:30h

Naručeno samoubistvo, Portugal, 2007, 92 min., režija: Artur Serra Araújo

Crna komedija o Luísu Tinocu, tridesetogodišnjaku sa problematičnim djetinjstvom koji je nesretan zbog neuzvraćene ljubavi. Jednog dana dobije poziv od firme koja želi da mu proda samoubistvo, ovlašteno samoubistvo. Tinoco prihvata ponudu i kreće na putovanje koje neće biti lako kao što je mislio.

16.5.2011, 19:30h

Kajmak i marmelada, Slovenija, 2003, 90 min., režija: Branko Đurić

Nezadovoljna neodgovornošću i lijenošću svoga mladića, Bosanca Bože, Slovenka Špela odluči ga napustiti i vratiti se roditeljima. Ne bi li je ponovno osvojio, on počinje tražiti posao, obrativši se svojemu poznaniku Goranu. Lakovjernost i želja da što brže zaradi uplest će ga u mutne poslove kojima se Goran bavi...

17.5.2011, 19:30h

Dobro došli gosp. Marshall!, Španija, 1953, 95 min., režija: Luis García Berlanga

Malo selo Villar del Río čeka na koncert Carmena Vargasa, Veliku andaluzijsku zvijezdu. Selo je pod upravom gluhog, neposlušnog i dobroćudnog načelnika, koji samo želi da udahne život ovom malom mjestu. U isto vrijeme dolaze dobre vijesti: posjeta visokih ličnosti iz Sjeverne Amerike koji nude finansijsku pomoć. Načelnik ne zna kako da ih ugosti. Agent Carmena Vargasa čini sve kako bi pripremio što bolji prijem za strance. Njegova ideja je da maskira sve farmere kao Andaluzane i da prefarba ulice tipičnim dekoracijama. Svi se bacaju na posao te počinju da sanjaju o tome šta će tražiti od Amerikanaca, koji će doći sa dolarima.

18.5.2011, 19:30h

Matičarka, Švicarska, 2009, 90 min., režija: Micha Lewinsky

Rahel Hubli je zaposlena kao matičarka. Godinama nije vjerovala u tzv. „ljubav života“, ali kada se prijatelj iz djetinjstva, Ben, odjednom pojavi, Rahel se ponovo prisjeti kako je to biti zaljubljena. To vodi u još veće probleme jer je Rahel već udata. Ben bi želio da se oženi, ali sa Rahel.

19.5.2011, 19:30h

Revers, Poljska, 2009, 99 min., režija: Borys Lankosz

Priča o ženama, smještena u sadašnjost i u pedesete godine 20. vijeka u Varšavi. Glavni lik je Sabina, povučena žena koja je upravo napunila tridesetu. Nedostaje joj muškarac u životu. Njena majka je upoznata sa svime i pokušava po svaku cijenu da kćerci nađe dobrog kandidata za muža. Baka, ekscentrična žena oštrog jezika od koje se ništa ne može sakriti, drži cijelu situaciju pod kontrolom. Jednog dana pojavljuje se niotkud šarmantni, inteligentni i zgodni Bronislaw. Njegovo prisustvo će razotkriti neočekivane događaje otkrivajući tamnu stranu ženske prirode.

Povodom predsjedavanja Republike Mađarske Vijećem Evropske unije, Sarajevski otvoreni centar, Kriterion i ambasada Republike Mađarske u Bosni i Hercegovini organizuju: SEDMICU MAĐARSKOG FILMA

9.-13.5.2011. OKC Abrašević, Alekse Šantića 2, Mostar

9.5.2011, 20h

Made in Hungaria, igrani film, režija: Gergely Fonyó, 2009, 109 min.

U vrijeme kada su svi željeli da pobjegnu na Zapad, mladić se vraća kući iz Amerike sa idejom da širi rock'n'roll... U proljeće 1963. Miki i njegovi roditelji ostavljaju iza sebe američki san i vraćaju se u Budimpeštu nakon četiri godine. U Mađarskoj su pomiješani revolucionari i kontrarevolucionari, a

Miki, koji je sada odličan gitarista i pjevač, novi Jerry Lee Lewis, nije više prihvaćen u starom društvu. Miki odlučuje da se prijavi na talent show kako bi pokazao da ima mjesto u starom-novom društvu.

10.5.2011, 20h

Sloboda i ljubav, igrani film, režija: Krisztina Goda,, 2006, 123 min.

Sjećanje na mađarsku revoluciju iz 1956. godine. Radnja se paralelno dešava u Budimpešti i na Olimpijskim igrama u Melbournu, u novembru iste godine. Dok Sovjetski tenkovi uništavaju Mađarsku, mađarski vaterpolo tim vodi nad Sovjetima na Olimpijskom bazenu u Melbournu, koji je opisan kao najkrvaviji vaterpolo meč u historiji.

11.5.2011, 20h

Bijeli dlan, igrani film, režija: Szabolcs Hajdu,, Mađarska, 2006, 97 min.

Nakon povrede gimnastičar Miklós Dongó dolazi u Kanadu kao trener sa ciljem da ponovo izgradi svoj život. Zbog svog načina života, sumnja da će se uklopiti u novi život i nove izazove raste. Prvo se mora suočiti sa prošlošću i djetinjstvom provedenim među zidovima gimnastičarske dvorane.

12.5.2011, 20h

Nešto američki, igrani filma, režija: Gábor Herendi,, 2002, 115 min.

Tamás je mladi reditelj TV spotova i reklama iz Budimpešte koji sanja o snimanju svog prvog dugometražnog filma. Već je napisao scenario ali nema novac za snimanje. Kada iznenada dobije mail od američkog producenta Alexa Brubecka, koji piše da mu se svidio scenario i da želi da se upoznaju, Tamás uviđa da se njegov san ostvaruje. Uz pomoć dvojice braće, Ákosa, uspješnog menadžera i sex-manijaka i Andrása, poetu i potpunog gubitnika, pokušava da impresionira Amerikancu i natjera ga da finansira film. Ali na putu su neka iznenađenja.

13.5.2011, 20h

Veće mađarskog kratkog filma: Priče sa istočne strane, 2010, 90 min.

Sunčana strana, režija: Csaba Bollók

Obrnuta strana, režija: Ferenc Török

Druga strana, režija: Márk Bodzsár

Divlja strana, režija: Szabolcs Hajdu

Film je baziran na mađarskoj savremenoj kratkoj priči. Četiri epizode obuhvataju širok spektar tema, od historijskih do ličnih priča običnih ljudi.

Filmski ciklus

Sex, Pop and Politics - filmovi koji propituju heteronormativnosti otvaranje mjesečnog ciklusa sa:

igrani film *Baby Love* (Comme les autres), režija: Vincent Garenq, Francuska, 2008, 90 min.

Oni imaju savršenu ljubavnu vezu... pa skoro. Emanuel želi dijete, ali Filip ne. Ipak, Emanuel se odlučuje na prvi korak u tom smjeru po cijenu da izgubi Filipa. Ali kako dobiti dijete kad se radi o dva muškarca? Osim propitivanje teme roditeljstva kod homoseksualnih parova i tema trudnoće i majčinstva, film je u svojoj suštini zapravo podrška različitosti.

12. maj 2011, 20.20 sati, Sarajevo, Art Kino Kriterion/Kino Tesla, Obala Kulina bana 2

13. maj 2011, 20 sati, Banjaluka, Gradsko pozorište Jazavac, Carice Milice 9

17. maj 2011, 20 sati, Mostar, OKC Abražević, Alekse Šantića 2



UDRUŽENJE IPAK - MLADOST GRADI BUDUĆNOST
PROJEKTNI URED: Patriotske lige 10, 75000 Tuzla, BiH
Tel/fax: 035 257 474, Telefon: 035 257 097
E-mail: ipak_tuzla@bih.net.ba,
www.ipak-mgb.ba, www.mladiuakciji.ba

Izveden performans na Trgu slobode



Tuzlaci su 20. aprila imali priliku da vide jednu od izvedbi politički nekorektnih performansa, koji je na Trgu slobode izvela grupa mladih iz Beograda i Tuzle. Izvedba je izazvala interesovanje građana i podstakla ih da reaguju i samim tim postanu dio cjeline performansa.

Ovaj nesvakidašnji prizor građani Tuzle su vidjeli zahvaljujući projektu Prekogračne saradnje za demokratsko društvo mladih kroz koji su saradnju ostvarili UG IPAK – Mladost gradi budućnost iz Tuzle i Grupa „Hajde da...“ iz Beograda.

Mladi su prethodno pohađali trening u Beogradu na kojem su naučili kako koristiti performans i na kreativan način izraziti stavove prema situaciji u društvu danas, te su prvu izvedbu i imali u Beogradu. Radionice su inspirisane životom i radom grčkog filozofa Sokrata koji je smatrao da je obrazloženo, nezavisno, kritičko mišljenje, osnova demokratije i pitanjem šta se sa tim idejama desilo danas. Projekat je podržan od strane Balkan Trust for Democracy.

Performans se u umjetnosti najčešće odnosi na događaj u kojem jedna grupa ljudi (performer ili performer) izvode, tj. ponašaju se na određeni način za drugu grupu ljudi — publiku. Ponekad je granica između performerera i publike vrlo mutna, pa se može reći da je i publika sa svojim reakcijama sastavni dio performansa. U središtu pažnje nisu uloge kao u pozorištu ili slike i objekti kao u likovnoj umjetnosti već akcije, pokreti i procesi.



Realiziran Trening na temu „Razumjevanje konflikta“



U periodu od 16.-17. aprila u prostorijama IOC IPAK-SHL realiziran je trening na temu razumijevanja konflikta. Ovo je prvi od deset ciklusa treninga koji će do kraja godine biti realizirani u okviru projekta PIN-Action.

Projekt PIN-Action uključuje mlade ljude iz ruralnih i perifernih sredina Podrinjske regije i putem planiranih mjera utiče na njihovu socijalnu integraciju i razvoj socijalnog dijaloga u lokalnoj zajednici.

Mladi ljudi dolazi iz partnerskih organizacija Regionalne omladinske mreže za lokalni razvoj i pojedinih komisija i vijeća za mlade pri opštinama Podrinjske regije. Projekt je podržna od strane Njemačkog Instituta za međunarodne odnose (IFA).



NVO MDD - Muslimansko dobrotvorno društvo - Merhamet Doboj
Kralja Aleksandra 17, 74 000 Doboj
Tel: 053 226 886
E-mail: merhamet.doboj@cutuk.net
Web: www.ngo.ba

AKTIVNOSTI H.O. „MERHAMET- A“ DOBOJ ZA MJESEC APRIL

„Merhamet“ je nastavio sa implementacijom projekata:

- Pružanje zdravstvene zaštite socijalno-ugroženim kategorijama
- Pomoć starim i nemoćnim osobama koje žive same
- Pronalaženje donatora za humanitarnu pomoć za socijalno-ugrožene kategorije.

Ostale aktivnosti „Merhamet-a“ Doboj:

- Predsjednica „Merhamet- a“ je prisustvovala skupštini organizator Unija za povratnike i raseljena lica.
- Održan prvi sastanak savjeta za socijalnu politiku i socijalnu zaštitu Opštine Doboj gdje je predsjednica „Merhamet- a“ Avdić Faketa član tima.
- Predsjednica „Merhamet- a“ Avdić Faketa prisustvovala dodjeli nagrada -fondacija Muradif Ćato u narodnom pozorištu Sarajevo.
- Održana godišnja skupština H.O. „Merhamet- a“ Sarajevo, prisustvovali aktivisti „Merhamet- a“ Doboj.
- Organizacija World vision organizovala samit NVO organizacija gdje je i „Merhamet“ partner za projekat „Naša djeca“.
- Mreža sporazum plus i CPCD organizovali seminar pod nazivom „Javno finansiranje NVO sektora u BiH ko, kako, koliko i kome“. Prisustvovala predsjednica „Merhamet- a“ Doboj.





UDRUŽENJE „GRAĐANSKI EDUKATIVNI CENTAR“ TUZLA

Kaldrma 2, 75 000 Tuzla

Tel: 063 237 134

E-mail: gec@gec.ba

Web: <http://gradanskiedukativnicentar.blogspot.com/>

Muzički edukativni program Avista (MEP AVISTA)

AVISTA

MUSIC EDUCATIONAL PROGRAM

harmoniku i klavir; osnove teorije muzike i horsko pjevanje pod stručnim nadzorom nastavnika muzičkog odgoja.

Građanski edukativni centar je i u aprilu mjesecu nastavio s svojim redovnim aktivnostima na realiziranju muzičkog edukativnog programa „Avista“. Nastavni proces na MEP-u odvija se planiranim tempom u skladu s nastavnim planom i programom do tri puta sedmično. Učenici u okviru radne sedmice pohađaju individualnu nastavu na odjelima za

harmoniku i klavir; osnove teorije muzike i horsko pjevanje pod stručnim nadzorom nastavnika muzičkog odgoja.

WEB PORTAL GEC-a (www.gec.ba)

GEC zahvaljujući finansijskoj podršci Fondacije tuzlanske zajednice, 23 aprila tekuće godine i zvanično je otvorio sopstveni web portal. Portal www.gec.ba treba da informira javnost o djelovanju udruženja, našim dosadašnjim ali i svim budućim aktivnostima.

Web stranica podrazumjeva osobnu kartu našeg organizacije te jako kvalitetan vid prezentacije. Otvorena (dostupna) je posjetiteljima 24 sata na dan, 365 dana u godini omogućava direktan kontakt s organizacijom.



MMC – MUSIC MASTER CLASS

Aktivisti GEC-a počeli su s opsežnim pripremanjima za MUSIC MASTER CLASS-a koji se po prvi put u ovom obliku organizira na području općine Tuzla. Dvodnevni MMC djeluje kao sub- program MEP AVISTA a namjenjen je za učenike osnovnih i osnovnih muzičkih škola.

Planirano je da MMC počne sredinom jula mjeseca i da se održava u intervalskim razmacima svaka dva mjeseca ukoliko bude potrebe za istim. Predavači na MMC-u su istaknuti mladi tuzlanski nastavnici muzičkog odgoja odnosno akademski muzičari.





UDRUŽENJE KULT

Centralni ured Sarajevo (CUS)

Banjska ul. 2, 71 210 Ilidža, Sarajevo

E-mail: kult@mladi.org, www.mladi.org

Tel/fax: 033/637 290, 033 621 351

Naomi Campbell posjetila SPAJALICU

Tim četvero mladih ljudi, postdiplomaca iz Irske, posjetili su SPAJALICU. U okviru master studija o temi Okoliša, društva i razvoja, Naomi Campbell, Alexa FitzGerald, Killian McCormack, Sinead O'Donnell dobili su zadatak da na području Bosne i Hercegovine pronađu nevladinu organizaciju i saznaju više informacija o njenom radu, načinu finansiranja, zainteresiranosti mladih ljudi za rad u nevladinom sektoru, kao i svim ostalim pitanjima u vezi s mladim ljudima i njihovim usavršavanjem. Upravo tim povodom su praktična iskustva i mišljenja, s mladim Ircima/kinjama, podijelili članovi KULTA. Timu iz Irske želimo puno sreće i uspjeha u daljnjem radu. Puno pozdrava, ili na irskom: Mairis is Fearr!



Sastanak s predsjednikom Komisije za pitanja mladih pri Predstavničkom domu Parlamenta FBiH

Poslanik u Predstavničkom domu Parlamenta FBiH i predsjednik Komisije za pitanja mladih Mirza Ustamujić i izvršni direktor KULTA Jasmin Bešić razgovarali su o procesu provođenja Zakona o mladima FBiH, koji je usvojen 2010. g. KULT je istaknuo da je tokom višemjesečne promocije Zakona oko 30 000 mladih u FBiH upoznato s njim. Komisija za pitanja mladih pri Predstavničkom domu i KULT pokrenut će inicijativu za donošenje zakona o volontiranju u ovoj godini. „Institucionalizacija volontiranja u Evropskoj uniji pokazala se kao pozitivan primjer priznavanja iskustva koje mladi stiču svojim volonterskim radom“, kazao je Ustamujić.

Bešić je naglasio veliku potrebu za programima zapošljavanja i neformalne obuke mladih ljudi: „Prema mišljenju mladih ljudi, bolje obrazovanje i šanse za posao osiguravaju im perspektivnu budućnost unutar granica BiH“.



New Balkan Winds

Još jedna interesantna posjeta dogodila se SPAJALICI u aprilu: Mladi Oriol Casas iz Barselone radi kao novinar televizijske emisije *New Balkan Winds*. Njegova reportaža će obuhvatiti i priču iz Bosne i Hercegovine koju pričaju mladi upućeni u stvarnu situaciju naše zemlje, kao i ljudi koji rade s mladima, izražavajući svoje mišljenje o narednim potezima naše domovine povodom ulaska u EU, proširenju EU, te političko-ekonomskom jačanju.

Oriol je sa projektnim saradnicima/ama projekata Udruženja KULT razgovarao o mladima koji su angažirani u KULTU, koji volontiraju u SPAJALICI, te o formalnom i neformalnom obrazovanju, o realiziranim aktivnostima i aktivnostima koje nas očekuju u skorije vrijeme.

KULTOVI partneri od sada i u Ljubinju

Udruženje KULT potpisalo je Sporazum o saradnji u projektu *Jednake mogućnosti za sve mlade!* s Opštinom Ljubinje i UG Teledom Ljubinje. Potpisnici će zajedno učestvovati u provođenju sljedećih

projektnih aktivnosti: istraživanju o socijalnom uključivanju u lokalnim zajednicama, studijskoj posjeti Berlinu, provođenju preporuka, obuci za društveno isključene mlade, javnoj kampanji i radionici za predstavnike/ce vlasti. Pored posjete načelniku, predstavnici/ce Udruženja KULT posjetili su i prostorije UG Teledom Ljubinje.

Formirana regionalna Mreža za promociju društvenog uključivanja mladih



Predstavnici/e organizacija triju zemalja, BiH, Hrvatske i Srbije, koje učestvuju u projektu *Jednake mogućnosti za sve mlade!*, okupili su se u Sarajevu kako bi potpisali sporazum o pristupanju Mreži za promociju društvenog uključivanja mladih, te dogovora u vezi s provođenjem projektnih aktivnosti.

Cilj Mreže je povećati svijest o značaju politika društvenog uključivanja, kao i bolja informiranost mladih o mogućnostima društvenog angažmana.

Sastanak je bio prilika da se članice Mreže upoznaju s detaljima projekta, dogovore o načinu provođenja projektnih aktivnosti, te da razmijene svoja dosadašnja iskustva u radu s mladima. Posvećenost, marljivost i produktivan rad učesnika/ca tokom ova tri dana rezultirali su mnoštvom ideja i konkretnih prijedloga, koji će biti bitne karike uspješnosti projekta.

Sastanak članica Mreže Volonterskog dnevnika™

„Namjera sastanka bila je da se upoznamo s dosadašnjim rezultatima Mreže i da se iznesu problemi članica s kojima se susrećemo u radu“, kazali su predstavnici KULTA koji su vodili sastanak članica Mreže Volonterskog dnevnika™ u novootvorenom omladinskom centru za mlade Juvenis u Doboju. Predstavnici/e organizacija predložili su da se definiraju aktivnosti za 2012. g., te način na koji MVD može poboljšati svoj rad u drugim lokalnim zajednicama širom BiH. U narednom periodu zajednički će se početi s promocijom Mreže kao i lobiranjem radi usvajanja zakona o volontiranju.

1000 sadnica smreke za hiljadu života

Jedno drvo, jedan život je akcija organizirana kroz aktivnosti polaznika/ca obuke *Uči, misli i djeluj (UMiD)*. Pošumljavanje na lokalitetu *PD Bočica* je krenulo ispred zgrade *Elektro-Kakanj*. Odazvali su se mnogobrojni učenici/e kakanjskih srednjih škola, kao i poneki građani/ke. U sklopu akcije posađeno je 1000 sadnica smreke. Sunčano i toplo vrijeme zadržalo je učesnike/ce na druženju nakon akcije do kasnih poslijepodnevni sati, nakon čega su se vratili u Kakanj.

Općine Novo Sarajevo i Srebrenica spremne za izradu strategije prema mladima

U prostorijama Međunarodnog centra za djecu i omladinu Novo Sarajevo i Omladinskog centra Srebrenica, radne grupe za izradu strategije prema mladima prošle su KULTOVU jednodnevnu obuku za pisanje ovog dokumenta, koja će im značajno olakšati rad. Time je načinjen još jedan korak prema dobivanju ovog važnog dokumenta za sve mlade s područja ovih dviju općina. Usvajanjem Zakona o mladima FBiH krajem juna 2010. godine, izrada stretegije prema mladima postala je zakonska obaveza. Analiza položaja mladih koja će biti izrađena na osnovu istraživanja, predstavljat će polaznu osnovu za izradu strategije prema mladima.



Pronađi svoj put!

Peta berza rada *Career StartUp* pod motom *Pronađi svoj put* održana je 21. aprila u organizaciji Centra za razvoj karijere studenata Ekonomskog fakulteta u Sarajevu. Udruženje KULT i ove je godine podržao projekt *Career StartUp* i, zajedno sa još dvadeset kompanija na ovoj manifestaciji, pružio priliku studentima/cama da se na jednostavan način informiraju o kompanijama koje nude zaposlenje, koje osiguravaju pohađanje ferijalne prakse za studente/ice završnih godina studija, ali i o značaju volonterskog rada.

Kako smanjiti evropski rekord u nezaposlenosti?

Program obuke omladinskih lidera/ki UMiD nastavljen je osmom radionicom o temi *Traženje posla*. Na ovoj radionici 25 polaznika/ca su učili pisati CV, popratno pismo i načine traženja posla. Radi što boljeg upoznavanja s temom, angažirana je osoba iz privatne kompanije zadužena za ljudske resurse i s njom su mladi imali priliku raditi simulaciju intervjua za posao. Uskoro će ovi mladi izaći na tržište rada i vjerujemo da će im ova radionica pomoći u pronalasku posla.

Informiraj se! Zaštiti sebe i druge! Pokaži solidarnost!

Mladi vršnjački edukatori/ce, puni entuzijazma i poletnosti, stečeno znanje o metodologiji *Zaplovimo zajedno* prenijeli su učenicima/ama Srednje tehničke škole grafičkih tehnologija dizajna i multimedije. Prezentacija navedene metodologije održana je SPAJALICI, a prisustvovali su i vršnjački edukatori/ce iz općine Ilijaš.

30.000 mladih ima informaciju o Zakonu o mladima FBiH


Posljednjim prezentacijama privode se kraju i drugi krug promocije Zakona o mladima FBiH. Rezultati su sumirani i ponosni smo na ono što je KULTOV tim uradio kako bi mladi FBiH dobili informaciju o postojanju Zakona.

Predstaviti ćemo to u brojkama: **prezentacije Zakona su održane u 22 grada. Radionice o temi Politika prema mladima održane su u 18, a okrugli stolovi u 13 gradova.**

Sve to se dešavalo u 23 srednje škole, centra za mlade i općinske sale. 17 je udruženja prisustvovalo navedenim aktivnostima. U partnerstvu s KULTOM, četiri su omladinske organizacije provodile drugi krug promocije Zakona. 1 500 mladih bilo je direktnim učesnicima/ama. Oko 30 000 mladih ima informaciju o Zakonu o mladima FBiH. 70 medijskih kuća je prenijelo informaciju o Zakonu.

Uspostavljena je saradnja svih partnerskih organizacija s lokalnim vlastima i srednjim školama u gradovima gdje su održavane prezentacije.

Zakon o mladima FBiH promoviran u Ilidži, Vitezu, Jajcu, Zenici i Travniku.



Sigurniji koraci na ulicama



April je označio početak male akcija polaznica KOŠNICE iz Ilidže pod nazivom „*Ne moram bježati, znam se odbraniti.*“ Početak je vezan za održavanje radionice o samoodbrani i peper spreju. Uključeno je 55 djevojaka. Prošle su već pet treninga i našle se na polovini puta stjecanja kompletnih vještina samoodbrane i certifikata hrabrih žena koje sigurnije koračaju ulicama svoga grada jer sada znaju na odgovarajući način reagirati na neprijatna uznemiravanja. Delegacija fonda UN WOMEN iz New Yorka i Bratislave posjetila je urede provodilaca projekta KOŠNICA Udruženje KULT i BH Expert. Planovima za buduće aktivnosti i podršku ovome projektu

ispratili smo uvijek dobrodošle posjetiteljke Ureda UN WOMEN-a iz New Yorka i Bratislave.



PRONI CENTAR ZA OMLADINSKI RAZVOJ

Ive Andrića bb, 76 100 Brčko Distrikt BiH

Tel./Fax: 00 387 49 217 695

E-mail: pronibrco@teol.net

www.pronibrcko.ba



Април - мјесец чистоће

Волонтери и запослени ПРОНИ Центра за омладински развој су се 20.4.2011. године, прикључили акцији Комуналног предузећа Општине Бијељина у која има за циљ подизање свијести грађана о битности очувања чисте животне средине на подручју ове општине.

Ова акција је подржана и од стране других омладинских организација са подручја Општине Бијељина и сакупило се око 50 младих који су у шетњи од 3 km чистили улице и зелене површине овог града. Акција је завршена сађењем јелки на локацији 5 језера. Ову акцију је подржао и сам начелник Општине Бијељина Мићо Мићић.

ПРОНИ је еколошки освијештене организација и овом акцијом смо хтјели да покажемо да тако мало треба да се очува наша средина и да позовемо грађане да слиједу наш примјер.



Међународни дан борбе против мина

Међународни дан борбе против мина је 4. април и обилежава се у цијелом свијету. Босна и Херцеговина спада у ред земаља са највећим степеном загађења минама и тренутно је на подручју територије БиХ угрожено око 920.000 становника, од чега је у високим ризику њих око 155.000. Према подацима којима располаже Центар за уклањање мина (BH MAC) у прошлој години у минским пољима живот су изгубиле четри особе, а пет их је теже повриједено.

Живот становника у БиХ је у сталној опасности, а о томе говори и податак да је од окончања рата у БиХ од мина stradalo 1.669 особа, од чега смртно 588. У том периоду живот је изгубило и 44 деминера.

ПРОНИ Центар је организација која се, поред својих редовних активности, бави и пословима упозоравања од опасности од мина у БиХ, те на овај дан желимо да скренемо пажњу шире јавности о овом проблему и да позовемо власт да се озбиљније и студиозније бави проблемом угрожености мина становника у нашој земљи.



Међународни дан Рома

Први свјетски конгрес Рома одржан је 8.4.1971. године у Лондону, на коме је верификован назив „Роми“. Од тада се одлуком Уједињених народа тај дан обилежава као Свјетски дан Рома. Како Роми данас живе у Европи? Само у Европи живи 12 милиона Рома. Иако чине највећу „мањинску“ заједницу, често су третирано као грађани другог реда. Бројне ромске организације, владе и појединци покушавају посљедњих година промијенити слику о Ромима. ПРОНИ већ дуго сарађује са организацијама које се баве питањем Рома и стоји им на располагању и за даљу сарадњу.

**REKOM**

PRONI Centar za omladinski razvoj sprovodi kampanju REKOM - Regionalne komisije za utvrđivanje činjenica o ratnim zločinima i drugim teškim kršenjima ljudskih prava počinjenim od 1991. do 2001. na prostoru nekadašnje SFRJ u Republici Srpskoj i na teritoriji Brčko Distrikta BiH.

Ovo je kampanja prikupljanja potpisa za REKOM, projekt utvrđivanja istine o nesretnim dešavanjima koje su zatekla našu regiju tokom 90-ih godina prošlog stoljeća.

Ovim povodom i u svrhu što većeg uspjeha kampanje PRONI Centar za omladinski razvoj kao partner za Republiku Srpske i Brčko Distrikt, počeo je sa svojim aktivnostima, koje podrazumjevaju medijsku promociju potpisivanja putem interneta, ali i mnogobrojim akcijama prikupljanja potpisa na javnim mjestima koje će uslijediti tijekom cijelog svibnja/maja.

PRONI će, pored velikih akcija u najvećim gradovima Republike Srpske, svoje aktivnosti proširiti i na manje gradove, jer je u interesu kompletnog programa da se čuje glas što je moguće većeg broja građana naše zemlje.

Ovom prilikom pozivamo sve građane da se priključe ovoj kampanji i da svojim potpisom doprinesete procesu utvrđivanja prave istine na području Bosne i Hercegovine, bez mješanja političkih faktora.

Potpise možete ostaviti u PRONI kancelarijama: Brčko - Ive Andrića bb i Bijeljina - Ivana Gorana Kovačića 5 ili online.

OMLADINSKI KULTURNI CENTAR „BOSNA ART“
POLJE BB, 75324 STJEPAN POLJE
TELEFON:062-348-464; 035-792-833
E-MAIL ADRESA:almir_uco@hotmail.com

Učenici osnovne škole " Stjepan Polje" u Stjepan Polju, članovi ekološke sekcije udruženja Bosna Art, opet su 22. aprila dali svoj doprinos obilježavanju Dana planete Zemlje. Evo i nekoliko slika.



NOVE ČLANICE



UDRUŽENJE "ANEA - MLADI GRAČANICE" (ANEA-MG)

Armije BiH br. 1, 75320 Gračanica

Tel: 035 - 707 - 386

Email: anea_mg@hotmail.com

Web: <http://www.anea-mg.com>

Kratak istorijat organizacije:

Udruženje "ANEA-Mladi Gračanice" osnovano je 11.03.2009. godine s ciljem da se život mladih u Gračanici obogati novim dešavanjima, te da se mladima pruži šansa za realizaciju ideja sa područja edukacije, sporta, kulture, ekologije i drugih društvenih područja. Djelatnosti udruženja su upoznavanje šire javnosti sa novim oblicima kultura, te afirmacija mladih, osnaživanje i jačanje kapaciteta i resursa omladinskih organizacija, neformalnih grupa mladih posebno u mladim sredinama, te praćenje, podsticanje i jačanje rada mladih i omladinskih organizacija.

Udruženje ima za cilj promoviranje mladih ljudi putem inicijativa koje će stimulirati sudjelovanje mladih u životu zajednice, stvaranje prilika za kreativno i umjetničko izražavanje mladih promovišući njihova djela, te sudjelovanje u humanitarnim aktivnostima.

Najvažniji projekti udruženja su trodnevni festival urbane muzike Flavour Fest, edukacija i jačanje mladih u okviru Omladinskog centra ANEA u Gračanici, informisanje mladih, osnaživanje djevojaka, rad sa djecom, humanitarne aktivnosti, te organizacija kulturnih manifestacija.

Planovi Udruženja ANEA-Mladi Gračanice su:

- Razvoj aktivnosti za mlade u okviru Omladinskog centra ANEA
- Proširenje ponude edukacije i treninga za mlade
- Razvoj kulturnog i zabavnog sadržaja za mlade
- Osnaživanje situacionih kapaciteta za mlade
- Informisanje mladih

INFORMACIJE / SAOPŠTENJA/ POZIVI

1. Aktuelni programi Trening na temu “Partnerstvo i umrezavanje” koji TACSO BiH organizuje u Sarajevu 31. maja 2011. godine

Pozadina događaja:

Svrha projekta TACSO je jačanje sveukupnih kapaciteta i odgovornosti organizacija civilnog društva (OCD) u zemljama korisnicima IPA sredstava i garantovanje kvaliteta usluga kao i održive uloge organizacija civilnog društva u demokratskim procesima. Osnovni ciljevi projekta su :

- Povećati i poboljšati kapacitet i aktivnosti organizacija civilnog društva i
- Poboljšati demokratsku ulogu organizacija civilnog društva.

Ciljevi i rezultati treninga:

- Razumjevanje osnovnih principa uspješne saradnje
- Izgradnja komunikacijskih kanala između partnera u projektima i elemenata održivog partnerstva
- Identifikovati ključne i kritične tačke u odnosima između partnera

Tokom treninga učesnicima će biti predstavljene slijedeće oblasti:

- Kooperacija, koordinacija i kolaboracija
- Razmjena resursa
- Dvosmjerna komunikacija i balans između očekivanja i doprinosa partnera tokom implementacije projekata
- Najčešće greške u komunikaciji među partnerima

Ciljna grupa: Predstavnici mreža i saveza OCD. Ispred svake mreže i saveza OCD mogu biti delegirana 2 predstavnika za učešće na treningu.

Procedura aplikacije:

Zainteresovani predstavnici mreže i saveza OCD trebaju dostaviti popunjeni TACSO trening formular (ne treba da prelazi 2 stranice) koji se nalazi u prilogu ovog poziva najkasnije: **do 20.05. 2011** do 16:00 časova na e-mail: info.ba@tacso.org sa naslovom: „Partnerstvo i umrežavanje” zajedno sa - Kratkim pismom motivacije (slobodni format do 1 stranice) za učešće na treningu.

Napomena: Trening je besplatan za učesnike/ce. TACSO BiH će pokriti učesnicima koji dolaze izvan Brčkog putne troškove u iznosu od 0,2 konvertibilne marke po km, a za sve učesnike obezbjediti ručak i osvježenje.

Vise informacija kao i formular za prijavu ucesca mozete naci na linku:

<http://tacso.org/news/training-opp/?id=4441>

Za dodatna pojašnjenja ili pitanja, molimo Vas da kontaktirate TACSO BH kancelariju: telefon: 033 656 877; e-mail: info.ba@tacso.org

Lidija Skaro, Project Officer
TACSO BiH Office
Kalesijska 14, 71000
Sarajevo, Bosnia & Herzegovina
Telefon: +387 (0) 33 656 877
e-mail: lidija.skaro@tacso.org

2. INFO DANI O MOGUĆNOSTIMA FINANSIRANJA PROJEKATA U OKVIRU PROGRAMU KULTURA 2007.-2013.

Imajući u vidu da je Bosna i Hercegovina od 01. januara 2011. godine postala punopravni član programa EU Kultura 2007-2013, ovim putem želimo Vas informirati da Kontakt tačka za Kulturu Bosne i Hercegovine koje djeluje pri Ministarstvu civilnih poslova BiH, a u saradnji sa nadležnim entitetskim ministarstvima, u prvoj polovini 2011. godine planira održavanje 3 info dana o mogućnostima finansiranja projekata u okviru navedenog programa.

Na ovim događajima predstavnici javnih ustanova, nevladinog sektora, kao i privatne organizacije koje imaju primarnu djelatnost u oblasti kulture imaće priliku da se detaljnije informišu o mogućnostima učešća u programu Kultura 2007-2013.

Planirani info dani održaće se prema sljedećem rasporedu:

- Sarajevo, 19. maja 2011.
- Banja Luka, 23. juna 2011.
- Brčko, 05. jula 2011

Na info danu u Sarajevu o programu Kultura govoriće predstavnici Kontakt tačke za Kulturu Srbije.

Na info danu u Banjoj Luci govoriće predstavnici Kontakt tačke za Kulturu Slovenije.

Na info danu u Brčkom govoriće predstavnici Kontakt tačke za Kulturu Hrvatske.

Također, želimo Vas informirati da će u periodu septembar-oktobar 2011. godine biti održana još 3 info dana u sljedećim gradovima: Bihać, Višegrad i Mostar.

Svi zainteresirani prijave treba da dostave najkasnije 10 dana prije održavanja planiranog info dana, kako bi im pravovremeno mogle biti dostavljene pozivnice.

Broj učesnika je ograničen. Ukoliko budemo imali veći broj prijavljenih prednost će imati oni koji su ranije dostavili prijavu, te predstavnici organizacija koje nisu imale priliku učestvovati na nekom od ranijih seminara o programu Kultura 2007-2013.

Ministarstvo civilnih poslova BiH
Kontakt tačka za Kulturu
Telefon:+ 387 33 492 555
Fax:+ 387 33 492 632
e-mail: edin.veladzic@mcp.gov.ba<<mailto:edin.veladzic@mcp.gov.ba>>

Federalno ministarstvo kulture i sporta
Negra Selimbegović Snežana Đorđević
Telefon: + 387 33 254 108 Telefon: +387 51 338 721
Fax: +387 33 254 151 Fax: + 387 51 338 877
e-mail: negra.selimbegovic@fmksa.com
e-mail: s.djordjevic@mp.vladars.net

PRIJAVA UČESNIKA ZA INFO DANE O MOGUĆNOSTIMA FINANSIRANJA PROJEKATA U OKVIRU PROGRAMU KULTURA 2007-2013

Ime i prezime:

Institucija iz koje dolazi:

Kontakti:

- mail:

- telefon:

- fax:

Prijavljujem se za info dan koji će se održati u (zaokružiti):

1. Sarajevo, 19. maja 2011.
2. Banja Luka, 23. juna 2011.
3. Brčko, 05. jula 2011.

DONATORI

- Javni poziv za apliciranje projekata u okviru Internacionalnog fonda za kulturnu raznolikost

Federalnom ministarstvu kulture i sporta, posredstvom Ministarstva civilnih poslova Bosne i Hercegovine, dostavljena je informacija o UNESCO-vom javnom pozivu za apliciranje projekata u okviru Internacionalnog fonda za kulturnu raznolikost.

Internationalni fond za kulturnu raznolikost je ustanovljen 2005. godine Konvencijom o zaštiti i promociji raznolikosti kulturnih izraza, čiji potpisnik je i Bosna i Hercegovina.

Svi zainteresirani za učešće na ovom javnom pozivu trebaju dostaviti prijavu i popunjen aplikacioni obrazac na jednom od službenih jezika u BiH i na engleskom jeziku, Državnoj komisiji za UNESCO najkasnije do 21. maja 2011. godine, na adresu:

Ministarstvo civilnih poslova Bosne i Hercegovine,
Državna komisija za UNESCO,
Trg Bosne i Hercegovine 1,
71000 Sarajevo

Ostale informacije o javnom pozivu možete pronaći na sljedećem linku:

<http://www.unesco.org/new/en/unesco/themes/2005-convention/international-fund-for-cultural-diversity/>

- Drugi poziv za dostavljanje prijedloga projekata u okviru IPA Prekograničnog prorama Bosna i Hercegovina – Crna Gora

Objavljen je drugi poziv za dostavljanje prijedloga projekata u okviru IPA Prekograničnog prorama Bosna i Hercegovina – Crna Gora! Ovaj poziv se odnosi na prvi prioritet programa: "Pružiti podršku stvaranju zajedničkog društveno-ekonomskog okruženja za ljude, zajednice i privrede programske oblasti", koji će biti implementiran kroz tri različite mjere:

Mjera I.1: Inicijative usmjerene na prekogranični privredni razvoj sa naglaskom na turistički i ruralni razvoj.

Mjera I.2: Inicijative usmjerene na unapređenje životne sredine ponajviše u cilju zaštite, promocije i raspolaganja prirodnim resursima.

Mjera I.3: Ostvarivanje društvene kohezije i kulturne razmjene putem institucionalnih i intervencija putem ličnog kontakta i akcija ljudi ljudima.

Sve relevantne dokumente za ovaj poziv, kao što su Vodič za aplikante i aplikacioni paket, možete preuzeti na: <http://cbc.bih-mne.org/index.php?type=1&a=pages&id=13>

Prijedloge projekata treba poslati najkasnije do 01.07.2011. godine u 16.00h na sljedeću adresu:

**Zajednički tehnički sekretarijat
Džemala Bijedića 185/12
71000 Sarajevo, Bosna i Hercegovina**

Ukoliko želite postaviti pitanje vezano za ovaj poziv možete to učiniti e-mailom na adresu: info@cbc.bih-mne.org ili putem linka: <http://cbc.bih-mne.org/index.php?type=1&a=faq>

Rok za postavljanje pitanja je 10.06.2011. godine. Na sva pitanja koja su stigla u roku odgovori će biti objavljeni na web stranici www.cbc.bih-mne.org najdalje do 20.06.2011.

Puno uspjeha želi Vam Zajednički tehnički sekretarijat!

O programu...

Prekogranični program Bosna i Hercegovina – Crna Gora realizuje se u okviru Instrumenta za pretpristupnu pomoć (IPA). Programska oblast pokriva granicu između Bosne i Hercegovine i Crne Gore. Programska oblast obuhvata površinu od 31.134,33 km² i ima 1.685.366 stanovnika. Teritorija Bosne i Hercegovine obuhvaćena programom sastoji se od 56 opština, dok je programom na teritoriji Crne Gore obuhvaćeno 13 opština (12 u prihvatljivom i 1 u pridruženom području).

Dragi prijatelji,

Ukoliko ste zainteresovani da se u mjesečnom informativnom biltenu Omladinskog Resursnog Centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design
Webmaster:

Emir Delalić-Zeko - Tuzla
emir.delalic@gmail.com

web: www.omladina-bih.net
mejling lista Mreže:
posta@omladina-bih.net

Adrese za slanje vaših informacija za mjesečni bilten:

hcatuzla@bih.net.ba; orcuzla@bih.net.ba
fax: 035 258 077

hCa Tuzla
Hadži Bakirbega Tuzlića 1,
75000 Tuzla
tel / fax: 035 258 077
e-mail: orcuzla@bih.net.ba
hcatuzla@bih.net.ba

Mjesečni bilten uređuje Omladinski resursni centar - ORC Tuzla